

## SANTIAGO ORETAGA RABE

---

### Uaiduacino

**1** <sup>1</sup>Caimaci, omoimo cartana oredicue. Santiagodicue. Cue mameci jiaicidi Jacobo. ¿Nigacino? ¿Nie isoidomoi? Jusiñamui jitailla rafuena cue finuamona, bie rafuena llofuecabiticue. Cai Nama Jesucristo facaina jiai llofuecabiticue. Cai doce nairaiaimo omoi duillamona, omoi jai judaisilla jira, omoimo cue uaina oredicue.

### Ramo omoi jiriadedi, omoi comeciaina mairita

<sup>2</sup>Amatai, diga ie ramo omoi jiriadedi, eo iobilla. <sup>3</sup>Ramo omoi jiriadedi, Jusiñamui uaina raise omoi iinuana uiñoitomoi. Iemona omoi comeciai mairillemona, iinocana omoi jaitomoi. Biena omoi uiñua jira, iobilla. <sup>4</sup>Mairicana omoi comeciai jaia, omoi comeciaidi marebicaite. Marebicaillamona, omoi comeciaino buena fiebicaiñeite. Nana Jusiñamui llogacinuaina ja muidomo iinoitomoi; <sup>5</sup>iadedi omoimo rafue ia, niese nibaiana omoi uiñoñenia, Jusiñamuimo jica. Ie mei omoimo naimiedi abi uiñoracinona iite. Jusiñamuidi nana naimiemo llotinomo iena caidñeno icabilla jira, omoimo iena jiai iite; <sup>6</sup>iadedi omoi jicaia, uai iñuanona jica. Omoi comeciai iñoñenia, jicañeno. Comecina iñoñedimiedi aifi betaja jorai isoide.

Naimie comeci naganomo ite.

<sup>7</sup>Naimiedi Jusiñamuimona ra feiñollemono tainona sedaite. <sup>8</sup>Naie isoidimiedi nana naimie illa dinori ie comeci naganomo iite.

<sup>9</sup>Naimie ramo jiriadedi, Jusiñamuimona naimie jamai bue isoñena jira, duerede creyente iobilla; <sup>10</sup>iadedi ramo jirillamona ie ucubena naimie faifia, Jusiñamuimona naimie ucubedi ieñena jira, ucuberede creyente iobilla. Safia isoi, naimie ico safenaite. <sup>11</sup>Jitoma a ia, eo ecasillamona, safia safenaite. Llrilde. Ie mei jai ebinide. Jai iñede. Ie isoi ucuberedimie safenaite, naimie maijianona. Ie mei naimie ucube bene jamai fiebite; ia Jusiñamui diga naimie jaca illamona, naimie jaca iobite.

### Nana mare rafue Jusiñamuimona feiñotica

<sup>12</sup>Ramo jiritimiedi ie comeci mairia, caimare iite. Jai naimie facacifilla mei, naimie comeci mairilla mei, Jusiñamuidi naimiena caimare itataite. Jusiñamui jai llote: “Cuen a isiruitinona cue illanomo jaca itataitica”. <sup>13</sup>O ramo bu faia, lloño: “Jusiñamuidi cuena ramo faite”. Marañede rafue dibeimo naimie iñena jira, naimiedi buna ramo jaca fañede. <sup>14</sup>Cai comecimo naie jitaillacino illa jira, ramo faia uai iñotica. Naie facaiseconi caimona ebirena jirari, iena finoacadicai. <sup>15</sup>Cai

jitailla jira, jeacinona finodicai. Jeacinona finocabillanona jaillano, faifiticaí. <sup>16</sup>Ero, cue isiruiga amatiai, Jusiñamui omoína ramo faitatañena jira, naimiemona da mare rafue billa jira, dani omoi abina jifueño. <sup>17</sup>Nana mare rafue cai Moomona feiñoticaí. Naimiedi monamo ite lligaiñoraniaina jaie finode. Naie radi nagarui daje isoi lligaiñoñede; iadedi naimie daje isoñede. Naimie comeci jacanano danocni nagarui ite. <sup>18</sup>Naimie jitailla jira, ie uai lluanu, naimie caina ie uruiaína itatate. Ie uruiaimona nano doforanidicaí.

### ¿Nie isoide rafuena finoacadicaí?

<sup>19</sup>Cue isiruiga amatiai, Jusiñamui rafuemo raise cacarei. Ie mei naie uaina uaitañeno. Jiai raire iciriño. <sup>20</sup>Icirillamona, Jusiñamuidi cai marena jitailla isoi, buna jaca marebicaiñede. <sup>21</sup>Ie jira nana maraiñedicinona oni fañonocai. Jusiñamui uai omoi comecimo fecuise abi iedoño nagarui feiñocana omoi jai. Naimie ie uai omoi comecimo jai itatate, iduai enruemo cai rilla isoi. Iduai sicuamona, llisilladi ite. Jusiñamui uai cai comeciaino itabillamona, caina jillotarede. <sup>22</sup>Cacajamona iena iñocana jai. Cacajanona iena omoi iñoñenia, dani abina jifuetomoi. <sup>23</sup>Bu naie uaina cacajamona iñoñenia, naimiedi acaranimu eruidimie isoide. <sup>24</sup>Ie uiecona eruaide. Naimie jailla meinoconi, ie eruailla ie llogacina bu eo facajia, iena feitañede. Iena iñnote. Naie uaidi jearedicino ie finuamona naimiena marena itatate. Jusiñamui uaina naimie feitaña jira, iena iñnua jira, naimie comeci caimare ite. <sup>26</sup>“Jusiñamuina sedadicue” raillanona ie comecina facadimiedi jeare ñaia,

maraiño ñaia, dama naimie abina jifute. Jusiñamuina taino sedade. <sup>27</sup>Cai Moo Jusiñamuina bu marena raise sedaacania, diga rafuena finoite: Naimiedi moonidinona canoite. Feciñuaina canoite, imaci sure illa facaiseconi. Jeacinona jiai finoacaiñeite. Jusiñamui díbeimo iñedino isoi iacaiñeite. Jusiñamui naimie iese sedajia, Jusiñamuimona eo mare.

### Nana cominimo comeciaina lloitaiacadicaí

**2** <sup>1</sup>Amatiai, cai Nama Jesucristo uai eo ebirede. Naimiena omoi iñnua jira, naimacimo daje isoi comeciaino lloillamona, nana cominina daje isoi nafue. <sup>2</sup>Ero, omoi roracomo mena iimania, ¿nie iimania nafueitomoi? Damie ucuberedimie. Naimiemo oro ie anillos ite. Eo mare iniroina jítade. <sup>3</sup>Ucuberedimiemo llotomoi: “Bai bene bancomo rai”. Dueredimiemo llotomoi: “Bai bene naidai. Raiaiania, enruemo rai”. <sup>4</sup>Iese omoi lloia, damienua jai raise nafuetomoi; ia damienua jai raise nafueñedomoi. Iaimaiia iniroimo omoi eruailamona, nafuetomoi. Mare rafuemo comeciaina facañedomoi. <sup>5</sup>Cue isiruiga amatiai, cacarei. Jusiñamuidi dueredinona fetode. Cominimona dueredimaci; ia Jusiñamuimona duenedimaci, naimiena naimaci eo iñnua illa jira. Naimiena naimaci isiruilla jira, naimie cominina jai jaidimaci. Naie isoidinomo jai llote: “Omoimo cue illanona iiticue”. <sup>6</sup>Ero, Jusiñamui dueredinona nafuete; iadedi dueredimienai jai nafueñedomoi. Dueredinomona duere sefuiñedomoi; ia dueredimienai jai duere finodomoi. Ucuberedinomona duere sefuicabidomoi; ia ucuberedimienai raise nafuetomoi. Maijitalena, juez dine ucuberedino omoína uitatatimaci,

omoina llogidollena. Dueredino iese omoina finoñedimaci; ia ucuberedinodi iena finocabidimaci. <sup>7</sup>Cristomo omoi jainaiailmona, ucuberedino naimiena jeare jiai ñaitimaci.

<sup>8</sup>“Cristo llogacino finodicai” raillanomo comeciaina facajamona ucuberedimiena omoi nafueia, cuemona mare. Cristo naiena iese caimo llote: “O jofo ecimo itinona isirui, dama o abina o isirulla isoi”. Iese omoi ia, cuemona mare; <sup>9</sup>iadedi nana cominina daje isoi omoi nafueñenia, jeacinona jai finodomoí. Jai Jusiñamui llogacinona ñinoñedomoí. Jusiñamui llogacinomona jai maraiñeno itomoí. <sup>10</sup>Nana Jusiñamui llogacinuaimona daje llogacinona omoi ñinoñenia, Jusiñamuimona nana naie llogacinuaina jai ñinoñedomoí.

<sup>11</sup>Jusiñamui caimo jai llote: “O aifñede riño diga iñeno. O iniñede iima diga iñeno”. Jiai llote: “Jiaimiena meineñeno”. O aifñede riño diga iñedio; iadedi jiaimiena o meineia, nana Jusiñamui llogacinuai jai ñinoñedio.

<sup>12</sup>Jaiiruido Jusiñamuidi juez isoi omoímo lloite. Omoí comeciaino iticino diese omoímo lloite. Ie jira marena ñaino. Marena i. <sup>13</sup>Ero, omoímo naimie lloia, jiaie cominina omoi birui duenaiñenia, Jusiñamui naie facaise omoína duenaiñeite. Omoímo riire lloite. Omoína duere finoite; iadedi jiaie cominina birui omoi duenaia, Jusiñamui naie facaise omoína jiai duenaite. Duere sefuillena omoímo lloñeite.

**Jusiñamuina cai ñnuamona,  
diga rafuena cai finua**

<sup>14</sup>Amatiai, “Jusiñamuina ñnoticue” raitimiedi mare rafuena jaca finoñenia, ¿niese naie ñnoracinodi naimiena jillotaite? Jillotañeite. <sup>15</sup>Jiaie rafuedo iena lloiticue. Omoimona daje creyente ñiroinia, guille iñenia, <sup>16</sup>naie creyente

omoi dine bia, naimiemo omoi lloia: “Mai jai. Rosiruiñeno. Marena ailluena guiño”; ia naimiemo jaca buena omoi fecañenia, ¿bue ñellena iese naimiemo raitomoi? <sup>17</sup>Ero, Jusiñamui omoi ñnuamona mare rafuena omoi finoñenia, omoi ñnoracino ieñede. <sup>18</sup>Omoimona damie cuemo nibai lloite: “Jusiñamuina raise ñnoticue”. Jiaimie cuemo nibai lloite: “Mare rafuena finocabidicue”. Iaimaiaino lloiticue: “Jusiñamuina cai raise iinoia, mare rafuena finocabiticai. Mare rafuena cai ñnuamona, Jusiñamuina cai raise ñnuana uiñoiticai”. <sup>19</sup>Dajede Jusiñamuidi illana ñnotio. Iena o ñnuano, mare; iadedi janaiái iena jiai ñnotimaci. Ie jira Jusiñamuina jaciruitimaci. <sup>20</sup>Jusiñamuina raise ñnoticue” nibai nia raitio. Abina raise nia uiñoñedio. Mare rafue o jiai finoñenia, dama abi o ñnoracinodi ieñede. <sup>21</sup>¿Niese Jusiñamuimona cai usuma Abraham micoridi marebicaide? Naimiedi mare rafuena finuamona marebicaide. Jusiñamui jitailla rafuena naimie ñnuamona, faga ocaina isoi, naimiedi Jusiñamuimo ie jitona fecade. Naimie jitodi Isaac micori. <sup>22</sup>Abraham micori ñnote. Mare rafuena jiai finode. Mare rafue naimie finuamona, naimie jai raise ñnote. <sup>23</sup>Iemona Jusiñamui ie llogacino suide. Iena Moisés micori cuete: “Abraham micori Jusiñamuina ñnote. Ie jira Jusiñamuimona naimie marebicaide”. Jiai cuete: “Naimiedi Jusiñamui nabai”. <sup>24</sup>Abraham micori rafuemona daje rafuena uiñotitai. Dama ie ñnoracino diga jaca bu marebicañede; iadedi Jusiñamuina ñnuano, mare rafuena finuano, marebicaide. <sup>25</sup>Jiaie rafuedo iena lloiticue. Jai Rahab raillañaiño ite. Naiñaiño callirediñaiño. Mare rafuena finuano, naiñaiñodi Jusiñamuimona

marebicaide. Naiñaiñodi ie jofomo Josué ie rafuena uiraimaiaina feiñote. Naiñaiño nairaidi iaimaiaina meinellena jenodimaci. Meineñellena, naiñaiño iaimaiaina reide. Ie mei iaimaiaina bainino oretate. Mare rafuena naiñaiño finuamona, Jusiñamuimona naiñaiño marebicaide. <sup>26</sup>Ero, bumo ie joreño jai iñenia, cajeñede. Ie isoide. Mare rafue bu finoñenia, ie iinoracinodi ieñede.

### Cai fuiaimona jeacinodi comuide

**3** <sup>1</sup>Amatai, omoimona diga comini creyentiaina llofuerainina jaiñeno. Jusiñamuidi juez isoi ico lloite. Llofueraini jiaie comini baifemo uiñuamona, Jusiñamui rafuena naimaci eo raise iñoñenia, Jusiñamui naimacina jiano baifemo duere finoite. Iese riire naimacimo llua jaciruillano, llofuerainina ailluena jaiñeno. <sup>2</sup>Nana caidi diga maraiñede rafuena finocabidicai. Maraiñedicinona bu ñaiñenia, jai marebicaide. Naimie nana ie comeci namarede. <sup>3</sup>Jiaie rafuedo iena lloiticue. Caballos cai jitailla rana finollena, imaci fuemo lloemamona finoca janorede rana joneticai. Ie mei nana caballo ie abina namatadicai. <sup>4</sup>Riire aifi aillue botena nine uiacade; iadedi eo janorede quilla diga, ie jailla dine piloto botena dataoicaide. <sup>5</sup>Ie isoide cai fuiai. Eo janorede; iadedi cai fuiaimona diga rafuena comuide. Ero, eo janorede iraimona nana rasillaia bootate. <sup>6</sup>Cai fuiaidi irai isoide. Caimo jeacinona eo finotate. Nana cai comeciaina jearetatate. Taifemona ie uai ote. Nana cai ille dinori caina jearedicinona finotaicade.

<sup>7</sup>Nana rana toiredicai: ocainai, sillini, ofomai, eniruemo biicaidino, llicai. Nana toiredicai; <sup>8</sup>iadedi jaca bu ie fuena namatanide. Cai fuiai jaca eo maraiñede. Iemona eo maraiñede rafue

icabite. <sup>9</sup>Cai fuiai diga cai Namamo, ua cai Moomo, marecinona lloticai. Caina naimie finuamona Jusiñamuina eruaidicai; iadedi cai fuiai diga naimiena jeare jiai ñaiticai. <sup>10</sup>Cai fue di dajede; iade marecinona ñaiticai. Maraiñedicinona jiai ñaiticai. Amatai, iese cai ñaiñena. <sup>11</sup>Ero, daje pozomona mare jinui, erirede jinui diga, oñedicai. <sup>12</sup>Amatai, higuera railla raramona aceitunadi comuiñede. Uvas railla raramona higo railla riaradi jiai comuiñede. Cuere de jinuiamona mare jinui oñedicai. Cai fuiaimona jeacino comuiñellena, cai fuiaina cai namataja.

### Ua abi uiñoracino

<sup>13</sup>Omoimona, ¿bu ua abi uiñote? Naimie ua abi uiñoia, naimie marena illamona, iena uiñoitomoi. Abi iedoño mare rafuena naimie finoia, naimiemo ua abi uiñoracino illana uiñoitomoi; <sup>14</sup>iadedi naimie abi eo uradoia, dama naimiemo ite ramo comecina facaia, naimie abi uiñoracino diga naimie abina iedoñena. Jai tainona llote. Naimie llua isoi iñede. <sup>15</sup>Naie isoide uiñoracinodi Jusiñamuimona iñede. Bie enirue ie. Comini ie. Taife ie. <sup>16</sup>Comini abina uradoia, dani naimacimo ite ramo comeciaina naimaci facaia, comini uri iñedimaci. Diga maraiñede rafue naimacimo ite. <sup>17</sup>Jusiñamuimona ite ua abi uiñoracinodi mare. Bumo ia, uri ite. Riinide. Comeci jinide. Jiaie cominina duenaite. Mare rafuena finocabide. Cominina raise nafuete. Abi tainona jifueñede. <sup>18</sup>Bu uri ia, jiaie cominina uri itatate. Ie jira naimie marena iite, Jusiñamui jitailla isoi.

### ¿Bue ñellena uri iñedicai?

**4** <sup>1</sup>¿Bue ñellena fuiriruidomoi? ¿Bue ñellena iciriruidomoi? Omoi comeciaino maraiñedicino illa muidona.

Omoi comeciaimo maraiñeno jitaillacino illa muidona. Naie jitaillacino omoi comeciaimo namataacana muidona.

<sup>2</sup>Rana jitaïdomoi. Iena omoi feiñoñena jira, naimaci rana fillena, comena meinetomoi. Eo uradoidomoi. Omoi jitaille rana feiñoñena jira, fuiridomoi. Omoi jitaille rana Jusiñamuimo omoi jicañena jira, iena feiñoñedomoi.

<sup>3</sup>Jiaïcaïño Jusiñamuimo jicadomoi; iadedi raise jicañedomoi. Ie jira iena feiñoñedomoi. Dani omoi jitailla ra feiñoñena, omoi comeci jaisillena, jicadomoi. <sup>4</sup>Jusiñamuina birui raise jitaïñedomoi; ia naimie ðibeimo iñedinona jai jitaïdomoi. Bie eniruemo ite rafuena omoi isiruillamona, Jusiñamuina jai raise nabaiñedomoi. ¿Niese iena uiñoñedomoi? Bu naie rafuena

isiruïacania, Jusiñamui ðibeimo jai iacaiñede. <sup>5</sup>Jusiñamui cuetatagafuiaina raise facañedomoi. Naiedi caïmo llotte: “Jusiñamui omoïmo jai fecaca Joreñodi omoi comecina eo raise namataacade”. <sup>6</sup>Caina eo duenaila jira, naimie ðibeïmo cai raise illena, Jusiñamuidi caina eo canoacade. Jusiñamui cuetatagafuiiai iena llotte: “Jusiñamuidi abi iedotimiena canoñede; iadedi abi iedoñedimiena canode”. Naimie ðibeïmo iacaiñedimiena ñaite. Naimie ðibeïmo iacadimiena canuana jiaï ñaite.

<sup>7</sup>Ie jira Jusiñamui anamo omoi i. Naimiena raise omoi iño. Taife uaina jitaïñenanona, naimie uaina oni caïño. Ie mei omoïmona naimie oni jaite.

<sup>8</sup>Jusiñamuina nabaillena, naimie ðine iaïre omoi i. Ie mei naimie omoi ðine iaïreno iite. Jeacinona finoraini, omoi comeciai uaiïllaina meido. Naganomo omoi comeciaina facañeno. Omoi comeciaina marena fino. <sup>9</sup>Maraiñede rafue omoi jai finuamona, omoi sunai. Jaisiñeno, ie ia omoi jeacino facaina omoi mai ee. Caimare iñeno; ia omoi jeacino

facaina omoi mai sunai. <sup>10</sup>Jusiñamui ðibeïmo abina iedoñeno omoi i. Ie mei naimie omoi comeciaina iobitaite.

### Jiaïno jinafomo jeare ñaiñeno

<sup>11</sup>Amataï, maraiñede rafuena naimaci fïnoïadedi, jiaïno jinafomo jeare ñaiñeno. Creyente jinafomo bu jeare ñaïa, creyentena bu jicoïa, creyentena naimie isiruïñena jira, Jusiñamui uaina raise iñoñede. Jusiñamui uaina naimie iñoñenamona, Jusiñamui uaina jiaï jamaiñoacade. <sup>12</sup>Jusiñamuidi maraiñede rafuena finodimiena duere finoite. Cai jeacinomona caina jillotarede. Cai jeacino facaina caina duere finorede. Ie jira jiaïe creyentena jicoñeno.

### Ico are caïmo suite rafuena uiñoñedicaï

<sup>13</sup>Jiaïe rafuena lloïacadiïue. Nibai llotomoi: “Birui jiaïe nairaïmo jaiticaï. Birui cai jaiñenia, ico are jaiticaï. Rana fecajamona ucube cai ollena, nainomo daje año iiticaï”. <sup>14</sup>Iese llotomoi; iadedi nie isoïde rafue ico are illena uiñoñedomoi. Cai ille ðinori uillie illa isoï iticaï. Dallu bene iticaï. Ie mei jai iñedicaï. <sup>15</sup>Ie muidona omoi llua: “Cai Nama jitaïa, nia iiticaï. Cai Nama jitaïa, nie isoïde rafuena finoïticaï”. <sup>16</sup>Tena lloñedomoi; iadedi dani omoi comeciaina facajano llotomoi. Iemona eo abina iedotomoi. Abina ieduadi maraiñede. <sup>17</sup>Mare rafuena finuana uiñotimiedi mare rafuena finoñenia, jeacino jai finode.

### Ucuberedinomo llucacino

**5** <sup>1</sup>Ucuberedino, daje rafuena omoïmo jiaï lloïacadiïue. Omoïmo ramo jirite. Ja eo duere sefuitomoi. Ie jira cuiïri-cuiïri ee. <sup>2</sup>Omoi raruiiai ja sabite. Omoi mare inïroi ja sabite, ibuisai guilla jira. <sup>3</sup>Omoi ucube ja ieñeïte. Ieñena jira,

comini omoi faifillana uiñoitimaci.  
 Abina faifitomoi, iraimo ra boa isoi.  
<sup>4</sup>Ero, ailluena ucube irairuillai iena jai eenotomoi. Naie facasedi jai ride. Omoi maijiraini maijiamona ucubedi omoimo nia ite. Omoi eniruemo maijidimaci; ia naimacina raise ibañedomoi. Jai eedimaci. Cai nanoca Nama iena cacade.  
<sup>5</sup>Omoi illa dinori ailluena raruiai omoimo ite. Nana omoi comeciai jitailla rafuena finodomoi. Omoi comeci jitailla isoi itomoi. Naie iba ollirui jai ride.  
<sup>6</sup>Maredinona duere finodomoi. Nie isoide rafuena omoimo finoñedimaci. Abina riidoñedimaci; iadedi naimacina meinetomoi. Ie jira Jusiñamuimona ja duere sefuitomoi.

**Cai Nama billemo  
 fecuise omoi ocuiri**

<sup>7</sup>Amatiai, cai Nama billemo fecuise omoi ocuiri. Cominidi imaci illimona riaru feñuana sedadimaci. Noci deillemo fecuise ocuiridimaci. Ie mei riaru llisillana otimaci. <sup>8</sup>Ie isoi cai Nama billemo fecuise ocuiri. Omoi comeciai rucaicueriñeno, cai Nama bille iaie illa jira. <sup>9</sup>Duere omoi sefuiua, Jusiñamui juez isoi omoimo lloi raillano, “Jiaie creyente muidona duere sefuidicue” raiñeno. Jusiñamui omoi illana raise uiñote.  
<sup>10</sup>Amatiai, Jusiñamuina lloraini micoriaimona cai fueua. Cai Nama ðibeimo ñaitimaci. Duere sefuidimaci; iadedi eecuñedimaci. <sup>11</sup>Naimaci Jusiñamuina fainonocaiñena jira: “Naimaci comeciaidi caimare itimaci” raiticai. Job micorina jiai comecitacai. Naimie jaie ite. Naimie eñeno duere sefuide. Duere sefuide; ia Jusiñamuina fainonocaiñede. Ie mei ja muidomo nie isoide cai Nama naimiena finuana uiñoticai. Cai Namadi naimiena duenailla jira, naimiena raise canode. Caina jiai duenaite. Ie jira caina jiai canoite.

<sup>12</sup>Cue amatiai, nanoca rafuena nia lloiacadicue. Omoi lloga uai omoi finollena jiaie comini uiñollena, Jusiñamui mamecina llinotomoi. “Tena cai llinoia, cai lloga uaina cai finoñenia, Jusiñamui caina duere finoite” raitomoi. Omoi lloga uai omoi finollena, Jusiñamui mamecina jamai ebena llinoñeno. Monamo ite ra mamecina jamai ebena llinoñeno. Eniruemo ite ra mamecina jamai ebena llinoñeno; iadedi nie isoide rafuena omoi llumona, uanaicinona jaca llono. Iese llono, Jusiñamui omoina duere finoi raillano.

<sup>13</sup>Omoimona duere sefuidimie ia, naimie Jusiñamuimo jicaja. Comeci caimare itimie ia, Jusiñamuimo iobillacinona rua. <sup>14</sup>Duidimie ia, naimaci naimieri Jusiñamuimo jillena, creyentiaina sedarainina uaidua. Naimacidi farena naimie abimo gia, cai Namamo jianona, naimie ie duicomona jilloillena. <sup>15</sup>Finuano jiaia, jilloite. Cai Nama naimiena jillotaite. Naimie finoca jeacinona oni jiai dotajite. <sup>16</sup>Ie jira coninimo omoi marañedicinona llono. Ie mei Jusiñamuimo coniniaina omoi jii, omoi duicomona omoi jilloillena. Jusiñamuimo marebicaidimie jiaia, ðiga rafuena finorede. <sup>17</sup>Elfana comecitomoi. Jaie ite; ia naimiedi cai isoide. Jusiñamuimo jide, noci deiñellena. Ie mei daje amani ðemona abimo atomonado jaca deiñede. <sup>18</sup>Ie mei dane jide, noci deillena. Ie jira noci deide. Ie mei riaru dane sicode.

<sup>19</sup>Amatiai, omoimona damiedi Jusiñamui ie uanaicino ðibeimona jaja, dane Jusiñamui ðibeimo naimiena bu itataia, eo mare. <sup>20</sup>Tena bu finoia, naimiena ie uañedicinomona itatate. Faifillemona jai jillotate. Jusiñamuidi naimie jeacinuaina oni dotajamona, iemona jiai jillotate. Mai. Santiagodicue.